

# **PILIPIAN**

## **vdwa Paul gv Siti Jinam**

### **Mintamchonam**

*Paul gv siti lvknam si Pilippian* vdwgv mvngjwngnv vdwa Europ vdwgv kvdw lo Rom mooku arwng lo doonv Mesidonia lo oogv Paul ninyigv riturikebv gvrja mvlwk jikunam vdwa siti sum lvkto. Soogv siti sum Apostol Paul ninyigv Patwk doi alulo siti sum lvkto, okv ninyigv ribv gvvnam kristan ajin Kvgonv ninyigv peelv bv alymabv minla adwkaku dubv rimutoku. Okv vbvriyi alulo um Pilippi gvrja lo mvvlarula minggo karla riyilo siti sum lvkto. Vbvrijvka Paul gv ninyi Jisu Kristo gvlo arwng rungbv mvngjwng siku lokv mvngpu okv mvnglwkw nama minbwk jila siti so lvktoku.

Soogv siti sum lvknam lvkwng si oogv jilwknam amin lvgabv Pilippi kristan vdwgv ninyigv mvnggab nam alu dwa oogv bunugv ninyia mvdurridurla jilwk kunam am umbonyikv vla minv dubv lvkla jilwkto. Hv soogv alvnt dw sum rinpanv gvrila haapok am pvktsintv dubv mvngsula rigv nvdubv bunua mintam do, vkvlgavbolo bunu vdwv hapokv pvktv ladubv okv ninyigv adwkaku mvnwng lo mvngangatvng mabv dakrap minsu ladubv bunugv atubogv lvgabvka minto. Kaimvngsunam okv atubogv lvgabv mvngchik rigvkomam svnga, Jisu Kristo gv rvniak bv rinam am gvtoka vla Paul ninyi kumla minto. Paul bunu vdwa Kristo gvlo akingobv rinamv mvngjwng sinam lokv Pwknvyarnv gv anyuaya

gv amin jinamv vla minto, Jius vdwgv pvvb ridungrimalo riming gvnam lokvma. Kristo gvlo akingobv renv vdwa Pwknvyarnv gv mvngpuv okv sarsopoyo bv rinam am jidunv vla Paul siti lvkto.

Soogv siti so mvngpunam, mvngdw sinam, haapok pwkinnam, okv Kristan mvngjwngnam lo ribvdoobvla rinam okv turnam lo rinamdaknam lokv dinchi yanam lvgabv mvngla siti si jiu pv-dubv vla lvkto. So Paul gv Pilippi gvrja nga arwng rungbv paknama kaatam sitoku.

### **Arwng lokv darlinnam**

Mintamchonam (1:1-11)

Paul gv atubogv adwkaku sunam (1:12-26)

Kristo gv aralo turnam (2:27-2:18)

Timoti okv Epaphroditus gv lvgabv rungnam-panam (2:19-30)

Nyimak vdwa okv hinsarbabaknam lvkwnglo gamrwnam (3:1-4:9)

Paul okv ninyigv Pilippi lo doonv ajin vdw (4:10-20)

Minyungminya (4:21-23)

<sup>1</sup> Jisu Kristo gv pakbu akobv rinv Paul okv Timoty bunyi gv lokv—

Oogv Kristo gvlo akingobv rinv Pilippi lo doonv Pwknvyarnv gv nyi vdwa, gvrja nga rigvdogvnnv okv ridorminggvnnv vdwaka mintak sila:

<sup>2</sup> Ngonugv Abu Pwknvyarnv okv Ahtu Jisu kristo nonua ayanam okv sarsopoyo nama jilwk yilaka.

*Paul gv kumnamv Ninyigv purinv vdw lvgabv*

<sup>3</sup> Ngo Pwknvyarnvnyi umbonyikv vla kumrap dwkibv nonua mvngpadunv. <sup>4</sup> Okv ngo kumyi dwkibv mvngpu dula, nonu mvnwnv lvgabv ngo kumla ridunv. <sup>5</sup> Ogulvgavbolo riturike lokv rila yikula vjvlodvbv nonuno ngam gamlv gv kudungkua lo ridur la lamtv nga kaatam la ridu. <sup>6</sup> Okv vbvrinamv nonu gvlo soogv alvnnv kudungkua sum rirapgvnnv Pwknvyarnv, oogv Jisu Kristo gv aluv aanya ma dvdvbv so gv sum no gakbwng chikwngla riredore vla ngo alvrungbv mvngdunv. <sup>7</sup> Nonua ngoogv hapok aralo mvngpa dvdv kidunv! Okv vkvlvgabv nonugv lvkwnvlo ngoogv vbv mvngnam si mvngrung dubv rrirungdunv mvngdu. Ogulvgavbolo nonuno svkvvv kudungkua ogumvnwnv sum ridur dula Pwknvyarnv gv nga orpinorin sidubv jitoku, vjak ngo anyi baabwng nga patwk lo doodu laka, okv vdwlo ngo ajarabi bvka ridula gamlv am karingsiching bv okv gwlwkrungbv mvkukrikuk la riduku. <sup>8</sup> Ngo vdwlo nonu mvnwnv lvgabv achialvbv ngo haapok sokv mvngnamv Jisu kristo ninyigv atubogv aw lokv aanv ngv vla mindudw okv jvjvrungbv minam am Pwknvyarnv ngo gvbbv miria jinv ngv.

<sup>9</sup> Ngo nonugv pakmisiinam am jvjvklvbv chinampanam lokv okv rvbwngching jwngkadaka nam lokv lvkin gobv kai lo kaiyaya bv ribamdobam la ribvre vla kumdu, <sup>10</sup> vkvlvgavbolo nonuno ogunv alvyachok nvngvdw um gaklare. Vbvrubolo nonuno arwanyu nvbv rimare okv Kristo gv alu am alvmabv nvlwknam gobv riku mare. <sup>11</sup> Jisu Kristo mvngchik gv rilen gvvlanamv, Pwknvyarnv gvlo hartvnama okv

paknama laalwk dubv nonugv gwngnamsingnam lo jvvrungnv ngv alvjv bv doolwk la rire.

*Turnamv Kristo gv lvgabv*

<sup>12</sup> Ngoogv ajin vdwa, ngam ogugo ripvdw vbvri-  
nam oogv gamlv ngv jvvrungbv ridur la alvyabv  
rinvvngnv nvgobv rito, um ngo nonua chintoka  
vla mvngdunv. <sup>13</sup> Vbvrijo ngv kaakunamv, dvb-  
vkarv lo dakyanv okv nyikvvbi dvdv ngv ngam  
Kristo gv pakbu bv rinam lvgalo ngo patwk  
doopvnnv vla chintoku. <sup>14</sup> Okv ngoogv Patwk ar-  
alo doonam lokv mvngjwngbu twngtv yanv vdww  
kaiyago Ahtu gvlo mvngjwng svlwkla rito, vkvlv-  
gabv ogu guka busukano kaamabv pwktvrungbv  
bunu vdww twngtvyanv Doin am\* aludwkibv  
japgo yaya karla rito.

<sup>15</sup> Ridungrima gvbv Kvggonv kristo gv lvkwn-  
glo ngam kaanek la okv minwng la japgo kar-  
nia la ridu, vbvritola Kvggo nvgv rinamv albv  
mvngnam lokv kudungkua nga rito. <sup>16</sup> Soogv  
rinam si paknam lokv ripvnnv, ogulvgavbolo bunu  
vdww ngam gamlv nga jvjv ngvrung vla rinvv  
kudungkua nga Pwknvyarnv gvlo gvngv jipvnnv  
vla chindu. <sup>17</sup> Kvvbi vdww, Kristonyi jvjv albv  
japgo jimadu, vbvritola bunu awgv yalu lokv  
mvngchik mvngdu; bunu ngoogv patwk aralo  
doilo maatar albv mvrikmvchik modula erit  
emu dubv vla mvngdu.

<sup>18</sup> Siidv ogugula! So lvkwnv lo ngo mvngpudu—  
ogulvgavbolo alvnnv lamtv lokv mindulo vmalo  
alvmanv lamtv lokv mindulo, Kristo gv gamlv am

---

**1:13** Nyim 28:30 \* **1:14** Doin; Kvggonv manuscripts loPwkn-  
vyarnv gv doin.

jaggo kardu. Okv vkvlgabv ngo mvngpu la ribvre. <sup>19</sup> Ogulvgavbolo nonugv kumnam lokv okv Jisu Kristo gv Dow gv ridurnam lokv ngam laalin pvkunv vla ngo chindu. <sup>20</sup> Ngoogv arwngrungbv mvngnamv okv ngo mvngtin dunv si ngoogv kudungkua lo vdwloka remabv doonam kaamare mvngdunv, vbvritola oogv dw mvnwnng lo, okv jvjvklvbv vjak daadwka, ngo mvngtvmvngru gv chvrv ngv lvvpuk dvdvre, vkvlgabv, ngo turjvka okv sijvka, ngoogv adwnayak am Kristonyi hartv nvla ribvre. <sup>21</sup> Holvgabv turnamv ogudw? Ngoogv lvgabv, Kristo nv. Vbvrikunamv, sinamv, alvyabv turnam laalwk yareku. <sup>22</sup> Vbvrijvka ngo turla dubv dvdv bolo ngo kaiyayabv arv doonv kudungkua lo rila tvnvpv, vbvrikubolo ogugunyi gakla riyidw um ngo mila nyuya ma. <sup>23</sup> Ngam aba anyi gobv putoku. Ngo soogv adwnamar bv turnam sum achialvbv kayu nwnngdu okv Kristo gvloya akingobv riming gvnwnng yaduku, hoka ngoogv lvgabv ogumvnwnng ngv alvyanv gobv ridu; <sup>24</sup> Vbvritola nonugv lvgabv ngo turla doonam si achialvgo dinchianv ngv. <sup>25</sup> Sum ngo jvjvklv hinrungsidu, okv vkvlgabv doodvre vla ngo chinsudu. Nonu mvnwnng gv lvkobv ngo doore, nonugv alvbv rinamdaknam am kaiyayabv ripwngrita dvdubv okv mvngjwng lo himpure. <sup>26</sup> Vkvlgabv vdwlo nonu lvkobv ngo lvkodv doodv ridw, nonugv turnam lo Jisu Kristo gvlo akingobv rikulo nonu ngam kaiyayabv googv sinvnam gobv rire.

<sup>27</sup> Vjakgv, dinchirungnam si um nonugv turnam lamtv lo Kristo gv gamlv mingku jvbv vn-

grungtoka, vkvlvgavbolo ngo nonu gvlo vngla okv kaala mabv rijvka, nonugv mvngjwng ngv vngdvng la gamlv lvgabv nonuno rungkirunglak gvrila akingobv dakrap minsula okv um mvngnamv akingobv turbumlarbum nama ngo tvvpa tvnvpv. <sup>28</sup> Nonuno nyimak vdwa busu yoka; haapok am pwktpwkru la ribv laka, okv vbvri-nam lokv bunugv rilamanam am okv nonu rigumriya yareku vla bunu chinsukaasu riku, ogulvgavbolo nonua rigumriya yadubv jinv ngv Pwknvyarnv ngv jidu. <sup>29</sup> Ogulvgavbolo nonua Kristo gv kudungkua nga ridubv jito, ninyia mvngjwng mvngchik la rimwng yoka, vbvritola ninyigv lvgabv hindarkaso aka hindubv jito. <sup>30</sup> Vjak nonu ngoogv yalungnyimak damku lo daming gvla do. Soogv yalungnyimak damkwng minsu dubv ngam nonugv kaanam si kvvlo gv damro akinv, okv vbvching nonu tvvsudu, oogv akin am ngo vjvlodvbv damkwng minsu dvvla ridungdu.

## 2

*Kristo gv kungrungkongko aami sinam okv kairungnam*

<sup>1</sup> Kristo gv aralo turnamv nonua gwlwksopa dubv mvdu, okv ninyigv paknamv nonua himpukain la rimudu. Nonuno Dow nga lvkobv ribamdu, nonuno ayanvngv ngv okv ajin anying lvgabv aya minsu namv doodu. <sup>2</sup> Vbvrinamv, ngo nonua kumdunv, mvngnam okv saknamv am akin gobv ridukalamla okv pakmisinam am lvyin akinbv ridukalamla okv

akin gobv mvngdukalamla okv lvkingobv tulwk sidukalamla rinam lokv nga mvngpu punyachika molaka. <sup>3</sup> Ogumvnwng nga atubogv lvgabv rinu mvngchik gobv riyoka vbmajvka anyung kaama bv gooyoka, vbvritola ajin anyingnga angamai minsulaka, atubonga mamsv nga kvvbi yanga alv yadubv mvngya toka. <sup>4</sup> Okv nonu atubogv lvga mvngchikbv mvngtvritv mabvya, ajinanying gv mvngchamricham koloya kaajitaji la ritoka. <sup>5</sup> Nonugv mvngdung nga Jisu Kristo gv mvngdung akinbv mvngrung toka:

<sup>6</sup> Hvkvgv gvlo Pwknvyarnv gv ridung ngv doodu, vbvrijvka Hv vdwloka Pwknvyarnvnyi karingsiching dubv mvngla rililala la ridukalam rungnvpv mvngmato.

<sup>7</sup> So vbmabvya, hv mvngsunam lokv ninyi gvlo doonv mvnwng nga kayu yala rito, okv atubongvya nyi pakbu gv ridungrima yanga laage sula rito.

Hv nyi gobv rito okv nyi adwnamar bv ritola nyi aingbv kaatam sitoku.

<sup>8</sup> Hv rvngam nvgobv rito okv sidulo gobv minam mvnwng nga tvnvrinv bv rila— ninyigv daapo lo silwk lo gobv tvnv rinvgobv ribwngtoku.

<sup>9</sup> So gv holvwng bv Pwknvyarnv ninyia aoyachoknv mooku dumpom lo laacha la rito okv kvvbi gv amin amam svnga kaiyabv ninyia kaiyarungnv amin gobv jitoku.

<sup>10</sup> Vbvrinamv Jisu gv amin am mvngdv gvdula nyidomooku gv mvnwng ngv, sichingmooku lokv mvnwng ngv, okv nyiamooku sokv arwng lo doonv mvnwng ngv,

vkvgv lwbwng lvkwng lo guba lwkla rire,  
 11 Okv nyi mvnwng ngv Jisu Kristo Ahtuv vla  
 tvvpakapa dubv japgo kare,  
 Pwknvyarnv Abu gv yunglit lvgabv.

*Nyiamooku svka loung aingbv ungnam*

12 Vkvlgabv, ngoogv ajin vdww, vdwlo ngo  
 nonugv lvkobv ribamdakbam la riyilo nonu  
 ngoogv gaam mingkulo tvvla ribv kito, vbv  
 dvdvbv vj akka ngo adula riduka nonu ngoogv  
 gaam am tvvdunv si maatar alvvv alvrungnv  
 gobv ridu. Nonugv ringlinbaalin am paanya  
 chikia dubv busula okv hvkdwnsikiak gvila  
 kudungkua nga ribv laka. 13 Ogulvgavbolo  
 Pwknvyarnv nonugv aralo mvnggya dadubv  
 nonua kudungkua ribvla ridungdu okv ninyigv  
 atubogv mvngku nyikibv tvvla dubv ridu.

14 Larmisinam vmalo japjurjabur minsunam  
 kamabv ogumvwnwng nga ritoka. 15 Vkvlgavbolo  
 nonu nyiabvda bv rila alvmanv rinam kam-  
 abv riri nvpv okv nyiamooku gv alvmanv okv  
 rimurnv nyi vdwgv duku ara so Pwknvyarnv gv  
 rvbwngchingnv umvuu gobv riri nvpv. Nonu  
 nyidomooku tologv takar ungnv aingbv bunugv  
 pingkolo ungtoka. 16 Turnam gv gaam am nonuno  
 bunua jappi gvila vbvching unggv nvbv ritoka.  
 Nonuno vbvching rijibolo, Kristo gv lotarlonya  
 alua ngo googing nvnvgobv rire, ogulvgavbolo  
 ngoogv ripv namv okv kudungkua rinam mvn-  
 wng ngv aya kamabv riyomanyi vla kaatamre.

17 Nonugv mvngjwng namv Pwknvyarnv gvlo  
 erinpeelwk jila daan lwknam aingbv ngoogv  
 turgv nvnv oyi am biilin jisv yikv. Vbvrinamgo



dubolo, ngo mvngpudu okv nonu mvnwnng lvkin govv ngoogv mvngpua orpin sidu. <sup>18</sup> Vbvching apiabv, nonuka mvngpu rungsv yikv okv nonugv mvngpua ngoogv lvkobv orpin sirung svngkv.

### *Timoti okv Epaphroditus*

<sup>19</sup> Si Ahtu Jisu gv mvnglwknam vbolo, ngo Timotinyi baapu albv vngmu jirung nppv mvngdunv, vkvlvgavbolo nonugv lvkwng lo yunying lokv ngo pvktpwkru lari nppv mvngdu. <sup>20</sup> Hv akinnv mvngchik ngoogv mvngnam am orpin sila jinv ngv okv oogv nonu lvgabv jvjvklvbv mvnggap ya-jinvngv. <sup>21</sup> Nyi dvdv ngv ogumvnwnng nga bunugv atubogv mvngnam lo rimwngdu, Jisu Kristo gv mvngnam bv rimadomadu. <sup>22</sup> Okv ninyigv albv rinam am hv oguaingbv himbwngrvkwng dubv kaatam dudw nonuno um atubongv chinsudu, oguaingbv nw la ngo, gamlv gv lvgabv, Kuunyilo gunv gvla okv hvkvgv abua kudungkua nga ribam kunam aingbv. <sup>23</sup> Vkvlgabv ngo gvbv ogunvgo rilin tvvdunvdw ngo chindanam gula ninyia nonu gvlo baapubv vngmu nppv vla mvngtin dunv. <sup>24</sup> Okv ngo atubongv awv nonu gvlo baapu albv vngurvngyin lare mvngla Ahtu gvlo mvngjwngdu.

<sup>25</sup> Nonu ngam ridur nppv mvngla jokriaparia dubv vngmunam okv ngo lvgabv yalung damyanv, kudungkua rinv okv rijivngji yanv ngonugv achiboru Epaphroditusnyi nonu gvlo vngmu jirung dukubv vla ngo mvngdu kunv. <sup>26</sup> Hv nonu mvnwnng nga achialbv kaanwngdu okv mvngru la ridu ogulvgavbolo nonu hv lvvmapv vla tvvpadu. <sup>27</sup> Jvjvklvbv achialbv lvvma maatar la rito okv sinam tungbv ritoku.

Vbvritola Pwknvyarnv ninyia aya la rito, okv ninyia tikma vbvritola ngaka, aya la rito okv kairungnv go mvngdwk tvvnam lokv ngam ringlin la ritoku. <sup>28</sup> Vbvrinamv, ngoogv nonu gvlo vngmu dubv mvnglwkw kunamv, nonu mvnwng ngv ninyia kaarwk sila mvngpu dukubv okv ngoogv mvngru mvngya mvnwng ngaka kaaku madubv. <sup>29</sup> Vbvrinamv, ninyia laarwk sitoka, Ahtu gvlo mvngjwngla rinv ajingonv mvngpu gvdula turwk sitoka. Ninyigv rinam aingbv rinv vkvny nyi dvdv nga mvngdv tvlaka, <sup>30</sup> ogulvgavbolo hv ninyigv singdung nga mvngnga sidula okv Kristo gv kudungkua lvlo sitardortar lwkla, nonugv awgv ngo lvgabv rila jima svnga ngam ridurvngdur jila ritoku.

### 3

#### *Jvjvklvny darwkchongjornv*

<sup>1</sup> Mintarminya bvku, ngokv ajin vdw, Ahtu gv lvkobv nonugv lvkin gobv rinamv mvngpu bv riyilaka. Lvkcho bv ogugo lvkro pvkudw um ngo lvktin dubv mvngku madu, okv ngo soogv ridunv si, nonugv awgv lvgabv alv svnga minchingmimunam gomwng. <sup>2</sup> Oogv alvmabv oguogu rinv iki vdw um okv atubogv ayak peesula rinv vdw um alvbv inkur kaarwk sitolaka. <sup>3</sup> Ngonu laka oogv jvjvklvbv ayakmvu sidubv laarwk sinv ngv, bunu makv, ogulvgavbolo Kristo gv gvlo akingobv ridula okv mvngpu dula ninyigv Dow lokv Pwknvyarnvnyi kumnvjonv ngv. Ngonu kvvbi agumai ridungripa lo ogu mvngjwng namgo kaama. <sup>4</sup> Vbvka, ngo riladunv, ngoogv mvngjwng nga vkvnylo jwnglwkw ladunv.

Nonu akonv agumai gv ridungripa lo mvngjwng ladu nvlo, ngo umka kaiyago oogv lvkwng nga mvngjwng ladunv. Rinam gvbvya, ngonu yadv ayakmvu sinam lo mvngjwng sidubv risvgo doyadu. Nonu yvv gonvka ayakmvu sinam ridung go, mvngjwng sinamgo doodu bolo, ngo yabv um kaiyago mvngjwng jiku ho lamtv ngv doyadu. <sup>5</sup> Vdwlo ngo alu lok kanw kubvdw ho ngo ayakmvu la ritoku. Ngo Israel nyi bv agargarlin namgo, Benjamin gv husi lokv linv, Hebrew oyi jvju lokv ngv. Jius pvbv lo ribv kunv vbolo, ngo yadv parasi bv riya nvgokv, <sup>6</sup> okv achialvbv kaanek la gvrja nga mvdwkmvku nvgobv rito. Moses gv Pvbv mingkulo nyi vdww tvvla kaala darwk nvgobv rila nvnvgv bolo, ngo rimur la rigakpanam kaama pvnvpv. <sup>7</sup> Vbvritola ngoogv ogumvnwng nga rilapala paabin kunam dvdv nga vjak ngo alvguinyi mvngla mvngsv ngvyi vjak kaakunamv vv Kristo lvgabv amaaya kaama mvngduku. <sup>8</sup> Oogv uguogu vv twkma; Ngo kiikahaka namv ogumvnwng ngv mvngnam si mvnwng ngv sinamngonam bv ridu ho mamsv nga Jisu Kristonyi ngoogv Ahtu bv chingku namsi vdwwgo achialvbv arv doyanvbv mvngdu kunv. Holvgabv ninyigv mvngnam am ogumvnwng nga ngo orpakpaga nyami pvkunv; Ngo vkvnv dvdv nga achuaya yaakunv bv mvngdu kunv. Ogulvgavbolo Jisu Kristonyi paadu kubv vla <sup>9</sup> okv ninyigv lvkobv akingobv rimichiki lwkrungre. Moses gv Pvbv mingkulo vngla avv darwknvbv mvsunam ho gv darwknv vv vjak ngo gvlo dookuma. Jisu Kristonyi mvngjwng nam lokv ngo vjak darwk nama paapvnv, Pwknvyarnv

gv lokv okv mvngjwngnam lokv darwknam si aadunv. <sup>10</sup> Ngo akin go chinwngdo vv Kristo okv ninyigv turkur kunam gv jwkrw nga hingkwkakw minggvso, ninyigv hinchng chingnam am chingdum mingvso okv ninyigv siku lo lvkobv siming gvdubv, <sup>11</sup> oogv vbv mvngtinnam lokv ngo awv atubongv sinam lokv turkur riku.

*Amin paajikulo joklwknam*

<sup>12</sup> Ngo mvnwng nga ringam tokubv vla vmalo rwbwngching dukunv vla mvngsu madunv. Ngo oogv amina paarung dubv rikw dunv Jisu Kristo oogv amin lvgabv nga darpvkunv. <sup>13</sup> Vv jvrung, ngoogv ajin vdw, ngo amin paaji nvnga paangam tokubv vla minsu madunv; Vbvrijvka, ngo rinamgo ridu, ngo vngrokunv rinamv ogu gubvya dw um mvngpa kuma dukunv okv oogv risv yanga umya lvgvlvma bv ridubv mvngdunv. <sup>14</sup> Vkvlgabv ngo amin paaji nvnga paadubv mvngla sida klavv joklwk jikubv jokdunv, oogv aotolo gv turnam Jisu Kristo gv lokv Pwknvyarnv gv goknam am padubv vla.

<sup>15</sup> Ngonu mvnwng ngv yvvdw darwkchongjor bv kamchikla ripvkudw mvngnamsaknam sum lvyinakin bv rirungdubv ridu. Vbvritola nonu kvvgo nvgonv mvngnam am lvyin akin mabv angusibv ridubolo, Pwknvyarnv sumka rwbwngching alvbv nonua mvbwk jire. <sup>16</sup> Vbv svbv ogubvrijvka, ngonu vjvlodvbv ridung sidunv sum klai vjakka ngonu ribvdakbv sula juka.

<sup>17</sup> Ngam kaagv sila ritoka, ngoogv ajin vdw. Nonugv lvgabv ngonu ogugo kaagv simu dubv rikiriak pvji nama yvnbunudw um riming

gvdunv ho vdwa nonu alvbv tvvgap kaagap laka. <sup>18</sup> Ngo nonua aikilo svkvnv sum achialvgo minji pvkunv, okv vjakka ngo lvkodv kapdula mindw jidunv: Hoka hoogv doonv nyimeego Jisu Kristo gv daapo lo silwk jinam am ninyia nyiru la ribv nyadu. <sup>19</sup> Bunu vdwv oyumooku lo nyelwk nyami tvvduku, ogulvgavbolo bunugv Pwknvyarnv bunugv adwnamar lo mvngnam bv rinya duku. Bunu vdwv ogugunyi hinyinghiru la rirung nsvv vdw umya bunu goonv nyalaya rinvdu, okv bunu soogv nyiamooku sokv uguogu mvngchik ka mvngbv la riduku. <sup>20</sup> Ngonu, ogubvrijvka, nyidomooku gv nyi vkula, okv ngonua turgvnv, Ahtu Jisu Kristo, nyidomooku lokv ireku vla, kaanwng rungbv dooyakaya la dooduku. <sup>21</sup> Hv ngonugv turkulvvku manv sijiyaaji kunv adwnamar sum mvkupmvv jireku okv bunua ninyigv aw yungla kunv adwnamar aingbv mvre, ho gv jwkrw nga rinvnvla nw ogumvnwng nga ninyigv ara lo laalwk reku.

## 4

### *Minsarnam*

<sup>1</sup> Vbvrikunamv, ngoogv ajin vdw, ngo vdwgo nonua pakdu okv ngo nonua vdwgo mvngpa laka ridu! okv vdwgo nonu ngam mvngpu mooto, okv ngo nonua vdwgo googing nvdu!—ngoogv ajin vdw, ngo svbv mindunv sum, nonu vdwgo turdudakdudw Ahtu gvlo alv rungbv doobvdakbv la rirung tvlaka. <sup>2</sup> Euodia okv Syntyche, nonyia ngo kumla mindunv, Ahtu Jisu gvlo nonyino anyibormv bv turwk sila akingobv ritokuka. <sup>3</sup> Okv ngoogv mvngjwngnv ajin nooka,

soogv nyimv vdw sum mvdurridur jilaka vla ngo mvngdu; Ogulvgavbolo bunu vdwv ngoogv gamlv japgokolo ngo lvkobv rilv kumabv ridum-ripa minggv toku. Klement gv lvkobv okv ngoogv kvvbi ribam ajin vdwv, bunugv aminv Pwknvyarnv gv turgvnnv kitap lo lvklwk duku.

<sup>4</sup> Alu lodak dwkibv nonu gvlo Ahtu gv lvkobv himpuv dubv yilaka. Ngo lvkodv mindv dunv: himpu yilaka!

<sup>5</sup> Nyi mvnwnng nga angamai bv rinamdaknam am kaatam laka. Ahtu gv aadw aluv nvchi duku. <sup>6</sup> Oguogu lvlo mvngrunguya mabv ka, vbvritola nonugv kumku mvnwnng lo ogugo nonu mvngdudw um Pwknvyarnv gvlo kumto laka, ninyia haapok lokv hartv dula kooto laka. <sup>7</sup> Okv Pwknvyarnv gv sarsopoyonamv, nyia gv chinam lo mvngchisakchi manam bv adula rikunv vv, nonugv haapok okv tuktumlo Jisu Kristo gv aralo akingobv rimula alvrungbv vvpvre.

<sup>8</sup> Minyungminya bvku, ngoogv ajin vdw, nonugv tuktumlo oogv oguogu alvnnv dvdv nga okv hartv dubv rinv: yikungyira jvjvbnv rinv, kaintapakla pakdubv rinv, tarwkbak, daadwvrvw nvlo, kaapu nvlo, okv mvngdv dubv rinv lo mvlwk mootoka. <sup>9</sup> Risarsila pvvtoka ogugo ngokv lokv chinpvdw okv laarwk sipvdw, anyi gv lokv ngoogv gamchar minam lola okv rinam lo. Okv Pwknvyarnv ngonua sarsopoyo nga jinvnngv nonua lvkobv doi laka.

*Amin go jinam lvgabv umbonyikv vnam*

<sup>10</sup> Ngoogv singnam lo Ahtu gv lvkobv akin dula rinam si ngo gvlo kairungnnv mvngpu nvgobv

ridu oogv vdwnv vngrokunv alu gv kokwng loku nonu ngo lvgabv kacharkayir la lvkodv kaatam la riraptoku. Svbv rinam si nonu ngam ngo lvgabv chigudabia kuma dvnv vla mima dunv—nonu gvlo chigudabia dubv ogu dw go paamato. <sup>11</sup> Okv ngo si achialin himpama vla mima dunv, ogulvgavbolo ngo atubogv gvlo ogugo doodudw um ngo hang nyumchi sila mvnggurusok sisv am chindu. <sup>12</sup> Ogugunyi chiidubv mvngdudw okv ogugunyi kaiyaje lakula lvvya yadu kudw um ngo chindu. Ngo svkvnv arwng nvnga chinro dukunv, vkvlvabv ogolojvka, vdw lojvka, ngo hang nyumchi svnga, vbvmajbvka ngo ako duku nvdw okv ako mavv kano dunvdw, vbvmajbvka, ngo gvlo chiilvlvmin duku nvdw vmalo chiima duku nvdw kvv nvnga ngo chinsudu. <sup>13</sup> Kristo gv Jwkrw jinam lokv himpuhiru mvnwnv am kaatam sula dubv ngo gvlo gwlvk vv doodunv.

<sup>14</sup> Vbvrijvka nonu ngoogv maatar jvbv hirukaya bv hinchorilo ridur la rinamv achialv bv albv ritoku. <sup>15</sup> Nonu Pilippian nyi vdww alv rungbv chindu ngo vdwo Mesedonia lokv vnglin jikula Alvvn Yunying am minggu la mincho karilo, um nonugv gvrja mvngchikv ngam mvdurridur mvngla rito; ngoogv pwbinpaabin nam ala okv nyenamngoonam lo ridumkaadum nvngv nonu mvngchik. <sup>16</sup> Vdwo ngo Tesalonika loka dootola ridur nama paala rijeka chiima namgo doorinyi nonu gvlo ngam ridur bvbv la jilwktu <sup>17</sup> Vbvrinam si ngo anyu bv laarwk sinam mvngchik nwnvnam twkma; um yamam svnga, ngo nonugv sapnam

kitab lo kaiyago doodv dubv mvngdunv. <sup>18</sup> Vbvri-namv, svka, ngoogv lvgabv laarwk sidubv nonugv jilwk kunam ogumvwnwng si—okv achialv bv lvbin yaje duku! Ngoogv ogumvwnwng chiimapamu nvnga, oogv amin nonugv jilwk kunam mvn-wng um vjak Epaphroditus ngam gvvlwk jila gva lwkji duku. Bunu Pwknvyarnvnyi namtinama rungnv, ninyigv mvnglwkw koodubv okv laarwk siyin koodubv daan ainggo jilwkto. <sup>19</sup> Okv ninyigv ogumvwnwng nyitv ngv Kristo Jisu gv lokv okv ngoogv Pwknvyarnv ngv nonugv dinchinam dvdv nga jiya reku. <sup>20</sup> Ngonugv Pwknvyarnv okv Abu gv yunglitnamv dvbvsingtam bv doobvre. Amen.

*Minyungminya bv Kumrwksinam*

<sup>21</sup> Jisu Kristo gvbv rinv Pwknvyarnv gv nyi nyichar dvdvlo kumrwksinam am jilwk dunv. Ngoogv riku so rinv Kristan ajin vdwv nonua bunugv kumrwksinam am jilwk nyadu.

<sup>22</sup> Pwknvyarnv gv nyi mvnwng ngv, oogv Dvbvyachok gv karv gv naam lo rinvdaknv vdwv kumrwksinam am jilwk nyadu.

<sup>23</sup> Nonu mvnwng gvlo Ahtu Jisu Kristo gv aya ngv lvkobv dubv yilaka.



**ANWNV GAMLV**  
**Tagin first Bible translation based on TEV (Good News)**  
copyright © 2018 The Word for the World International

Language: (Tagin)

Contributor: The Word for the World International

The New Testament in Tagin  
Published as

**ANWNV GAMLV**

The Word for the World International

This translation is made available to you under the terms of the Creative Commons Attribution license 4.0.

You may share and redistribute this Bible translation or extracts from it in any format, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-08-23

---

PDF generated using Haiola and XeLaTeX on 22 Feb 2024 from source files dated 15 Apr 2023

65e96bca-33d6-5dc6-a8ee-da485ecfb7ed